



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Netanyahu-i Gaza amokbangtsü
telemtetba agiogo

Canada Open: Mboko
semifinals tongogo

VOL. XXII ISSUE NO. 292 (ADOK 292)

DIMAPUR

RASEMNÜ (WEDNESDAY)

LUROI (LUROI) 06, 2025

₹ 5.00

Foothills Road ya ali kiburtem kisüing atema masü

Dimapur, Luroi/August 05 (TYO): Nagaland Foothills Road rangben ya Nagaland Foothills Road Co-ordination Committee ajanga 2013 kum atongtetba lir. Iba otsütsü project indang nukjidong tongtipangtiba ya Naga nungertem mezügmeshia aser merenshia amshiba nungi wazüka ayutsü aser asen state nung temelenshi aser mangdang tajung makaba ajanga Naga nunger lanurtem zünger mapa mangu tezütang kazütepba teblemtsü samatsütsü atema rongsenketzüng terenlok aser development bener arutsü lir, ta Dimapur nung aliba Chang Union, Khaimnuingan Union, Sangtam Union, Western Yimkhiong Hoho, Tikhir Union aser Rengma Peoples' Organisation lungjemer sangdong ka nung ashi.

Foothills Road ya kilometres 395 shi Peren district nung Khelma nungi Mon district nung Tizit tashi lir, aser yangji Chang, Khiamniungan, Sangtam, Yimkhiong aser Tikhir nunger li nung inch kata kongshia mali. Tesümgangtsüka, ali kiburtem rongnung Rengma kin dena liaka shisa agitepba nung mezüngokba ya mangateter. Ajisüaka Naga Survival Road nukjidong kanga junga angateta lir asünung, tanü tashi senotsü, nübu aser shisatsü agi kum 13 jungnüa akok tashi bendanga agütsür yaritepa arur, ta sangdong ajanga ashi.

Ozü lenir aikati iba People's Project asoshi tasüba agi memenep tashi bendanga agütsür inyakogo. Tang takum aliba özü lenirtemi iba Historic Project asoshi nüktzü aser asentzü yima bendanga agütsür inyaka arur.

Nagaland Foothills Road ya ali kiburtem lenmang masü People's Road lir, ta ashi.

"Ibai 'Landowner's Road' mesüra nisung kar atema kisüing asünungbo, kechiba mezünyongi onok jaok aser bendanga agüja kum 13 jungnüa özü resources ajak amshiba sülen kechiba temelaba makai aiter ama aridoker, kechiba onok mejaokba ainer ama amshir, onok jaokba ama aru, kechiba onoki mapa tamajung kar inyak ama amshir?" ta pamoki asüngdang.

Onok teinyaksü mapa kecha maliba agi iba mapa nung shilem agir masü, saka onok mazüngi liaka Naga nunger mechi nokdaker.

Taküm Nagaland Legislative Assembly nung iba Foothills Project indang ola tulu agi jangja-jangja jembiogo. Asenoki election ajanga asen melen nokdaksü asoshi shimertem kechi asü, parnoki Foothills Project indang jembitsü metemsü asü, aser kum 13 jungnüa iba Historic Project tapubang nung bener aruba Apex Tribal Hohos tem kong ali? Mesüra miim nukjidong kar ali asü?

Onok ya terenlok asoshi tetsükdaksü agütsütsü aruba masü, asen Nagaland state tejakleni aotsü aser terenlok asoshi külemi inyaksü onok yangi lir.

April 30, 2025 nü kasa Foothills Project atema Nagaland nung aliba Apex Tribal Hohos aser MLAs ajunga jaok, ano August 7, 2025 nü kasa project asoshi senden jatepa lir, saka özü Apex Tribal Hohos aser özü MLAs kata mejaok, koba onoki magizükteter aser kanga mepelar, ta Dimapur nung aliba kin trok sanger sangdong ajanga ashi.

MP S. Supongmeren-i Parliament nung Dimapur-Tizit railway onük benok



Bihar nung Special Intensive Revision (SIR) agiba anema August 5, 2025 nü New Delhi nung Nagaland nungi MP (Lok Sabha) S. Supongmeren Jamir dena opposition INDIA bloc lenirtemi longkak aitba noksa nung angur.

Dimapur, Luroi/August 05 (TYO): Tangtemendak Parliament session August 5, 2025 nü Member of Parliament (Lok Sabha) aser Nagaland Pradesh Congress Committee (NPCC) tir S. Supongmeren Jamir-i Rule 377 kübok tezüluba nung tongtipang ken o benoka liasü, ta NPCC Communications Department sangdong ka ajanga ashi.

Pai Ministry of Railways (North East Region) ajanga

2013-14 mapang Nagaland nung Dimapur nungi Tizit tashi railway line project tenzüka tang tashi anendaka aliba indang lemsatapa liasü.

Iba project nungya sen 4274 crore agi Dimapur aser Tizit tsüngta kilometres 257 awajemtsü asadangteta liasü.

Küm ter dak tema oaka, iba project atema senotsü agütsüba tazüngla nung lir.

MP S. Supongmeren Jamir-i

Union Minister of Railway dang tekeraba nung mera agia iba project mapa kuma inyaksü ajungshia liasü, ta sangdong nung ashi.

Kasa mapang Nagaland nungi Lok Sabha züngsem S. Supongmeren Jamir-i Delhi nung INDIA bloc nungi özüng yanglurtem den külemi Bihar nung Special Intensive Revision (SIR) agiba anema longkak aita liasü, ta sangdong ajangasa ashi.

Dimapur nung DMCEWU longkak ait tenzükogo

Dimapur, Luroi/August 05 (TYO): Ita pezü tashi itasen aser danga teyari magütsüba mechi Dimapur Municipal Council Employees' Welfare Union (DMCEWU) ajanga mapang telatet makai Kalibaro Road nung aliba DMC Office tejenba nung Mongulbarnü nungi longkak ait tenzükogo.

Dimapur Municipal Council, CEO Thungchanbemo Tungoe-i sangdong ka nung ita pezü itasen magütsü aliba nungi ita asem indang August 20, 2025 tashinung agütsütsü aser danga teyari ya October tashinung lema agütsütsü, ta ashi.

DMC ajanga aiben temulunglemtsü o shiaka par

employees indang itasen magütsü arur, aser item itasen ajunga pei accounts nung meinoktsü tashi maneni longkak aitsü, ta DMCEWU ajanga ashir.

DMCEWU nungya züngsem 435 lir, yangji mürekmejuba mapa (sanitation) inyaker nisung 208, technical aser ministerial staff 139, aser Grade IV staffs 88 lir.

Mongsenyimti nung T. Sentichuba nüngtem yangluba amphitheatre ka Nagaland CM-i lapoktsüogo



T Sentichuba Amphitheatre talang nungi tangokba noksa angur.

Mongsenyimti yim, 5th Aug (TYO): Mongsenyimti yimindak lenir asür T. Sentichuba nüngtem yangluba Amphitheatre ka August 5 nü Nagaland Chief Minister, Dr. Neiphiu Rio-i virtual ajanga lapoktsü. Asür T. Sentichuba ya Angetyongpang Assembly Constituency nungi tenet (7) ben tashi Nagaland Legislative Assembly election nung adoka nübur meyonga inyakba

yimsüsür ka lir.

Iba mapa ya inyaksü M/s Alemthy Jr nem agütsü aser mapaji Nov 2023 nungi tenzüka latettsüba mapang shitak nung renemetet. Amphitheatre nungi sabang den nisung 800 tashi mentettsüsa menden, tiyong nung moapu, kazüdak taktang, metsümeshidak peria aser lung agi akhi yimya nung yangluba noksa tapu balala angutsü.

Jangratemtsükaji; amphitheatre kimaji gari anendak tesatem lir aser mongpu ajak nung amshitettsüsa kilem tonga lir. Ibai SASCI 2023-24 kübok mezüngren 200 lakhs aser tanabubaren state fund 2023-24 nungi 95 lakhs intoka renem, ta YRS department nungi ketdangsür kadi kisüba osang ashidang metetdaksü.

Dr. Neiphiu Rio-i pa indang

office nungi online ajanga jembidang, ibai kisü tasen ka lapokba dang masü, saka ibai talangka nungi pungbanga aliba mapa ka asangsang ataloker, aser ibai Mongsenyimti nunger telungjem aser mangdang tamaitüsü tashi ajanga lir, aser ibai lungjemer merangba tamaitüsü ka noktakerba lir, ta pelaba olen ka metetdaksü.

Iba mapa ya asür T. Sentichuba asoshi aküm agüja tushiba tapet mapa ka lir. Pa ya mangdang akaba lenir ka, shibai Mongsenyimti nunger asoshi dang masü saka Ao kin aser state songjen rangloker inyakba nübu ka liasü, ta pai tsürabur tenüng sanga ashi.

"Iba amphitheatre asütsüba ya yimer taginüba tulu liasü, ibaji Advisor, Tongpang Ozüküm-i kü dang 2018 kum Tsüngremmung benjong amungdang taginüba ashi, saka idangji ni yimjak nung menangzük, saka iba mapa asangsang kümdaktsütsü asoshi ni akokba tashi nungittsü ta shia liasü", ta pai lemsatap.

Nisung 800 mentetba

amphitheatre ka sütetbaji nüburtem aser lenisüba lungjemba nungi takok ngutetba tamaitüsü lir. Iba yagi sempet aketer aser sobaliba kechisarena arangshitsü, wali-walir aser metapenzür puatsüsa yangi sentong tapu jenti atongba ajanga liso nüburtem rongsenketzüng nunga ajungkettsü imlar, ta paisa shisem.

Iba tesem yagi tesüiba akümtsüba, tanü benjongtepa, tarutsü asoshi ajungmesodi. Ibai lanurtem pungmang ngutetba tesem ka südakjang, sempet balala aketer tem tüzratema shilem agitetba tesem ka asütsü aser nüburtem külemi nümatanga lungjemba tesem ka asütsü, paisa moatsü.

Iba sentong nung MLA & Advisor Water Resources Department, Tongpang Ozüküm-i jembidang, 2nd August, 2018 nung Tsüngremmung amungdang amphitheatre ka nüngdaker ta Nagaland CMDr. Neiphiu Riodang shia liasü, pai ibaji mamatoki asangsang mapa kümtsüba asoshi pelaba metetdaksü.

(Maneni tapak 2 nung...)

Dimapur nung GST training agiogo



Dimapur nung GST training agiba sentong nung tangokba noksa angur.

Dimapur, Luroi/August 5 (TYO): Anogo ka atema Goods and Services Tax (GST) training August 5 nü Training Centre, Commissioner of Taxes, Lengrijan, Dimapur, Nagaland nung agiogo.

Iba training ya GST provisions dak sendakba nung tangazükba tali agütsütsü aser iba sülen tashi anga anidaksü asoshi Drawing & Disbursing Officers (DDOs), registered dealer tem aser tongtumbang stakeholder tem atema ayongzüka katsüogo.

Additional Commissioner of Taxes, Lima Imsong lenisüba nung iba sentong ya agi aser pai,

GST inyakym, return filing, aser compliance mandate dak sendakba nung sorkar ketdangsürtem aser shishilembartem nem shisatsü agütsütsü koda tongtumbang iba indang lemsatep. Paisa, rongsenketzüng anep anepa achaayangtsüba atema dang masü saka state indang revenue system nem teyari agütsütsü atema GST kanga junga angatettsüji kanga tongtumbang lir, ta ashi.

Department-i, GST dak sendakba nung osang tejangja agütsü, kong registration inyakym, e-way bills, returns filing, tax deductions at source

(TDS), tashi mangaba atema temerenshitem aser tawa update asüba GST temzüng özüngtem densema lir.

Training mapang session balala ya sensaksemtepa agütsüsa yanglu aser iba ajanga sentong nung shilem agirtem nem parnoki mangatetba jangjashitsü atema maangka agütsü aser mapa benoka inyakba mapang tetsükdaksü ajangshibatam mangajemi aliba jangjatsüogo. Training nung department balala nungi ketdangsürtem, local shishilembartem aser shishilembaba lokti tentet balalai shilem agia liasü.

Mokokchung DC ajanga metetdaksür

Dimapur, Luroi/August 05 (TYO): Public ground (Imkongmeren Sports Complex), Mokokchung kumzüka ayutsü, security aser tajungba nung ketdang asütsü mechi Deputy Commissioner, Mokokchung, Ajit Kumar Verma, IAS ajanga özüng kar agütsüogo.

Aonung 8:00 ako nungi anepdang 5:00 ako tashi ground shibanga ayutsü, latetja akaba

mapang saisapong dak sendakba inyakym dak alaka lokti adenshitsü memelatsü, ta sangdong ajanga ashi.

Temelaba agüja aliba sentongtem dak alaka gari kata ground telungi aitsü memelatsü, ground telung nung nokdanga aliba mozü/yi amshitsü khenyongi memelatsü aser nisung shingaia ground telung nung jana/plastic meindoktsüla,

ta DC Mokokchung sangdong ajanga ashi.

Item totuyuba nung aibelener dang senchi achiba den özüng agi mela aliba ama merenshitsü. Metetpelatsü asoshi Deputy Commissioner Office (9436605356) aser Caretaker, Imkongmeren Sports Complex (9862531393) den tongteprateptsü akok, ta sangdong ajangasa ashi.

Longleng DPDB-i takok angurtem tushi



Longleng District Planning and Development Board (DPDB) senden

Dimapur, Luroi/August 5 (TYO): Itashia amenba Longleng District Planning and Development Board (DPDB) senden August ita atema Deputy Commissioner aser Vice Chairman DPDB, Longleng, W. Manpai Phom, NCS lenisüba nung August 5 nü DPDB Hall nung menogo. Senden ya ketdangsür tasentem metetpelaba sülen tenzüka liasü.

Senden nung mendenbubai tawa tembangbuba All Nagaland Taekwondo championships mapang teyari balala agütsüba atema HoD tem dang kanga pelaba lemsatep. Paisa, tawa Chumukedima nung tembangba badminton asayamung aser Tuensang nung asayaba Khelo India Cluster Football Tournament nung medal angurtem nem tetushi agüja liasü.

Taoba senden minutes lepa reprangshiba sülen, Longleng

District kübok langa aliba officer aser staff tem nem District Planning and Development Board (DPDB)-i achaayanga District award agütsütsü aliba indang sensak asem, aser mendenbubai DPO dang District award indang criteria aser inyakym indang Department ajak nem metetdaksütsü, aser office tem dang langa aliba staff aser officer tem indang tenüng den nominee tem indang tezüluba nung osang agütsütsü asoshi metetdaksütsü nongloktsüogo. Iba inyakym ya August 11 nü tashi nungbo tembangtsüla.

House-isa, tesayurtem ajungmesotsü atema Teachers' Day award indang sensak asem, aser block level ajak nung langa aliba tesayurtem nem tetushi agütsütsü bangjema liasü.

Senden nung Department of Sericulture-i par department

inyakym indang PowerPoint ajanga metetdaksü. Maneni Department of Assistance Register of Cooperative Society dang taruba senden nung department inyakym indang metetdaksütsü tetuyuba agütsüogo. Iba senden ya mendenbubai tepela o jembiba sülen tembanga liasü.

Maneni Longleng nung taruba Independence Day anogomung atema Deputy Commissioner Longleng, W. Manpai Phom NCS lenisüba nung senden ka menogo.

Senden nung SDO (C) Longleng, Meyazungba Jamir-i, mapalem indang metetdaksü aser department balala nem mapa balala nonglokja liasü. Paisa, August 9 merekmejung sentong ayongzüka agütsü lateter aliba indang metetdaksü.

Iba senden nung department tekolak ajaki shilem agia liasü.

Social Welfare Department-i metetdaksür

Dimapur, Luroi/August 5 (TYO): Department of Social Welfare-i sangdong ka ajanga, 2025 academic session atema class I nungi VIII tashi asoshi Persons with Disabilities (State Scheme) tem atema Scholarship asoshi online application August 7 nü nungi lapoktsütsü. Iba anogo nungi tenzüka tang tasen apply

asürtem aser apply süshirtemi common scholarship Portal of Nagaland ajanga apply sütettsü. Iba scheme atema temsüa alirtem indang criteria aser guideline ya website <https://scholarship.nagaland.gov.in> nung angutsü.

Application benotsü atema tatembangbuba anogoji 2025 küm November 30 nü asütsü.

ARCS Mokokchung ajanga Co-op Society-tem dangi sangdonger

Mokokchung, Luroi/August 05 (TYO): Nagaland Cooperative Societies Act, 2017 Arrla 92(2) den külemi Arrla 82 aser 83 dak ajemdaker inyakymtem reprangdang Assistant Registrar of Cooperative Societies, Mokokchung kübok aliba Cooperative society aika inyakym kecha makaba aser mali den kasa aliba teloktem endokadoktsü jangjaogo, ta Deputy Registrar of Cooperative Societies, Mokokchung, Imtionen-i sangdong ka nung metetdaksü.

Sangdong nungsa item teloktemji office Notice Board

nung tejangja madakja lir aser kasa osang society-tem dangi registered post ajanga yokogo, ta metetdaksü.

Sangdong nungsa, Society shirnok tenüng endoktsü atema adoka lir parnoki tezüluba nung tanaben asendenshia tenzüka aotsü atema temepishiba shidi iba sangdong adokba anogo nungi ita ka tsüngda agüjang ta metetdaksü. Mapang tataktet shitak nung temepishiba magütsürtem ajak Registrar of Cooperative Societies, Nagaland, Kohima dangi society tenzüka aliba tenüng endoktsü atema yokadoktsü, ta metetdaksü.

AR-i "Breaking the Silence 3.0" campaign tenzüko



Dimapur, Luroi/August 5 (TYO): ACTS (Aid, Care Trust and Support) Connect aser Department of Social Welfare, Government of Nagaland na den longjemer Assam Rifles-i August 5 nü Don Bosco Higher Secondary School, Kohima nung tasembuba "Breaking the Silence 3.0" campaign amenokogo.

Iba campaign ya mental health aser substance abuse dak rangloker lanurtem nem tashi agütsütsü, mesenmetui amshibatam samatsütsü aser sensaksem aser tajangshiba balala lemsatepba ajanga memenodang jenjang agütsü asoshi inyakker.

Sentong nung Maj Gen Manish Kumar, SM, Inspector General Assam Rifles (North), tetushi tejaoker liasü aser Limawabang Jamir, IAS, Secretary (AhOD), Department of Social Welfare alakteta jaoker liasü.

Sentong nung beauty pageant koker alir nisung pongui sentepa aliba lokti ayongzüka liasü.

Don Bosco College, Oriental College, Chandmari High School, Mount Olive College aser Sazolie College nungi kaketsir aser faculty 400 dak temai iba sentong nung shilem agia liasü.

Mongsenyimti nung... (TAPAK1NUNGI...)

Tsürabur asür Sentichuba-i küm aika nübur meyonga aru asünung, pai yimer atema dang masü saka Angetyongpang A/C sanger asoshi mapa tajung jenti inyaktsüogo aser pai inyakba kuli tejangja kar. Saka pai konang mepushi, iyongji yimdak nüburtemi angutsüsa pai yanglua mayu. Anungji, iba amphitheatre pa nüngtem yangluba ya pa dak alang tetemsü lir, ta pai ashi. Iba ya tenüng ka jatsüba dang masü saka iba ajanga obalai alima asoshi inyakba nüburtemi bilemtettsüsa aser pa tenüng tanaben shilua arudaktsütsü nükla nung pa nem iba konang ya sempettsür, ta paisa metetdaksü.

Sentong nung Mokokchung DC, Ajit Singh Kumar Verma IAS;

NEZCC Director, Dr. Prashanna Gogoi; asür T. Sentichuba kinungtsü Chubasenla; Mongsenyimti Chairman, Aosungit, parnoki tepela o den tayongzüka o balala bener arua lemsatep. Arkum Club, Mongsenyimti aser Sonshan Dancing Troupe, New Yaongyimti nadi sobaliba yar tsüngsang aiba ajanga tesentepertem kanga longsodaktsü.

Mongsenyimti Baptist Arogo Pastor, L Yanger den temoatsü meshia sarasademer tenzüka aser Mongsenyimti Compound Baptist Arogo Pastor, Limasashi Kichu den tenüngsang agütsür sentong tembang. Iba sentong nung Kr. Sungtienla Ozukum menden liasü.

Uttarkashi nung tzümetzüng lendong nung nisung pezü asü



August 05, 2025 nü Uttarkashi district nung tzünglu sashia aruba sülen tzümetzüng ajanga kiojen aika raksaja ponger aoba noksa nung angur.

New Delhi, Luroi/August 05

(Agencies): Mongolbarnü Uttarakhand kübok Uttarkashi nung tzünglu kanga sashia aruba sülen tzümetzüng agi Dharali area nung kiojen aika ponger ao. Iba lendong nung nisung pezü asü aser aika samaogo.

Iba dak alia nisung 10 dak tali jana agi rembanga alitsüa akok, ta bilema kümzüka maparen inyakdar. Iba lendong nung hotel/homestays 20 dak tali ponger oadokogo.

Iba tatalokba dak sendakba nung Uttarakhand Chief Minister, Pushkar Singh Dhami-i, "Tzümetsüng ajanga Dharali (Uttarkashi) area nung takoksa tulu anguba ya tejashitsüka lir. SDRF, NDRF, district administration aser tangartemi teyari agütsüba aser kümzüka maparen inyakdar," ta

metetdaksü.

"Iba dak sendakba nung ni tongti ketdangsertem den tongtepratepa jembidar aser tensa mita reprangdar. Ajak kümzüka alitsü atema ni sarasademer," ta pai X ajanga metetdaksü.

Tzünglu sashia aruba sülen Kheer Ganga ayong nung tzümetzüng ayimba ajanga kiojen aika ponger oadok aser yimdaklirtem tetsübu nung jenshia liasü.

Iba tensa osang angashia Union Home Minister Amit Shah-i phone ajanga Uttarakhand Chief Minister Pushkar Singh Dhami den jembia osang metetpelaogo.

ITBP aser NDRF teams dang iba tesem jagi oa kümzüka maparen inyaksü tuyu. Indo-Tibetan Border

Force (ITBP) sepaitema iba tesemji tongogo aser National Disaster Response Force (NDRF) nungia team asem iba tesemji tongogo.

Uttarkashi Police-i X ajanga, Harsil area kübok Kheer Gad nung tzi level kanga atuba sülen police, SDRF, army aser disaster response team aika iba tesem jagi yokogo, ta metetdaksü.

Uttarkashi Police-isa, "Iba tatalokba nung ajemdaker nisung ajak dang ayongküm nungjagi talangka pilar alitsü metetdaksü. Na, ner chirnurtem aser kiset shiruru ajak ayongküm nungjagi pilaa alitsüla," ta metetdaksü.

Osang angazükba agi Uttarakhand state sorkari kümzüka maparen inyaksü atema Indian Army danga teyari meshiogo.

Delhi nung school fees atema benokba bill anema AAP-i longkak ait

New Delhi, August 05

(Agencies): Delhi nung nija school tem school fees dak sendakba bill ka benokba anema Aam Aadmi Party (AAP) MLA temi Delhi Assembly kima longkak ait.

Iba ya nija school kiburtem peladaksütsü nükjidong nung inyakba lir, ta AAP-i metetdaksü.

Tzüngluruwa mongpu Delhi assembly senden tetenzük anogo nung BJP sorkari Delhi School Education Transparency in Fixation & Regulation of Fees Bill, 2025 benokogo.

Delhi assembly nung Opposition lenir, Atishi leniba nung AAP MLA temi Mahatma Gandhi kürakyanglu anasa iba bill anema longkak

ait.

Taoba mapang Delhi chief minister Atishi-i, Bharatiya Janata Party (BJP)-i aniba sorkari tsüraburtem dang nungibo nija school kiburtem atema taliba bilemtsür, ta aitsü.

"Iba bill ya inyakim teladak asütsü atema masü saka school fees atutsü atema nija school tem nem temelaba agütsütsü atema lir. School tem nem fees tudaksütsü atema BJP-i April ita nungi iba bill menodaksü," ta lai ashi.


Atishi-i, iba bill ya school fees ajema kümdaksütsü atema masü aser iba bill kübok fee fixation committee ka tentetsü aser committee nung tongtiji school management asütsü, ta ashi.

Laisa, iba bill ya maneni reprangshitsü atema select committee ka nem agütsütsüla, ta ashiba den külemi sorkar dang iba özüng magizük tashi school fees atuba soita alitsüla, ta mepishia metetdaksü.

"Delhi nung tsüraburtem aser tanurtem temeden atema AAP-i maneni raratsü. BJP-i tashi angatsüsa akümtsü," ta laisa metetdaksü.

Osangbenertem den jembidang Atishi-i, "BJP aser Private Schools tsüngda tesendaktep lir. Nija school temi fees atuba sülen joko ita pezü süiadokogo. Iba committee nung chairman ji school fees atutsü tebilemba alir school management asütsü," ta metetdaksü.

MULUNGZEN O



Asür Obala Imyangerba Jamir
22.9.1933 19.7.2025

Ozü tsürabur Imyangerba Jamir, Changtongya Yimsen akümüli wadang tempanger teti tatem maka anisüngzükdaki ogo. Onok molung zürep aser tejashi nung alidang ana aser talang nungi kinungertem, tembartem, arogo nung, yimten, lokti balala, kija aser kibong nenok sarasadem, shisatsü, rongsen aser nubu agi yariogo, ajakdang kanga pelaba lemsateper.

Nenok temeim mapa asoshi ozüi nisung shia nem meyiba magütsutetaka takoksang Tsungremi maneni ano tali moajang ta ozü tamang sarasadem.

"...tasürtem mesamaba nung shia arudaksütsü..."

1 Korint 15 : 52

**Temeim Jalajabaso, Semchir,
Poner, Kinungertem aser Anükapang.**

पंजाब नैशनल बैंक **punjab national bank**
...बचते का प्रतीक ! ...the name you can BANK upon !

**DATA PRIVACY & MANAGEMENT DIVISION, HEAD OFFICE,
PLOT NO. 5, SECTOR-32, GURUGRAM HARYANA- 122001**

SANGDONGER

PNB Customer tem dang ya sangdonger!!

Temeim Customer tem,

RBI telatetbatem nung ajemdaker customer ajaki KYC update asütsüla. 30.06.2025 anogo tashi nung KYC update mesüi lira PNB ONE / IBS / registered E-mail / post ajanga mesüra nai 13.08.2025 anogo tashi nung Branch mashie kati oa KYC update asütsüla. Update masüba ajanga nü account nung tenokdangba kar ajurutsü akok.



PRASAR BHARATI
(India's Public Service Broadcaster)
Akashvani Kendra: Kohima

Marketing Executive nungdaker

**Kohima nung aliba Akashvani Kendra-i contract
basis nung Marketing Executive nungdaker.**

Osangkakettem nung iba sangdong agütsüba sülen anogo 15 tsüngda tejangrartemi online ajanga Prasar Bharati web link <https://avedan.prasarbharati.org/> nung application agütsüba den külemi peisasa attest asüba supporting documents agütsütsü akok. Temalen shia aliba link nung osang tejangja ajak lir. Application agütsüba inyakim nung timtem lira e-mail yangi asütsü akok: hrcpbs@prasarbharati.gov.in, iba denji külemi timtem adokbaji 'screenshot' ser agütsütsüla.

Taoba mapang Jammu & Kashmir Governor, Satyapal Malik süogo

New Delhi, August 05

(Agencies): Mongolbarnü taoba mapang Jammu & Kashmir nung Governor, Satya Pal Mallik süiadokogo; pa arrshi küm 79 liasü.

Malik ya tamalen Goa, Bihar, Meghalaya aser Odisha state tem nunga Governor inyaka liasü aser Lok Sabha o Rajya Sabha naprongla nung züngsem liasü.

Malik mapang talangka tezüngjang dak sendakba tashidak agi shiranga aruba sülen Mongolbar nikongdang 1:12 ako meta Delhi nung aliba Ram Manohar Lohia Hospital nung asü.

Pa Ram Manohar Lohia hospital indang ICU nung mapang talangka mongogo.

Uttar Pradesh kübok Baghpat nungi Malik ya Jat lenir ka liasü aser pa kaketshir asüba mapang nungi kaketshirtem rongnung lenir ka liasü.

1970s nung Charan Singh-i aniba Bharatiya Kranti Dal nung Malik-i mezüng dena yimtenren nung ajemoka liasü aser Uttar Pradesh assembly nung MLA inyak. Tesülen pa 1980 küm



Satya Pal Malik

nungi 1986 küm tashi Uttar Pradesh nungi Rajya Sabha MP inyaka liasü.

'The Bofors' ochimashi ken o dak sendakba nung tejashi nung pai Rajya Sabha nungi anenba den külemi INC nungia anenba sülen pai 'Jan Morcha' party tentet. 1988 küm iba party ya Janata Dal den zükloka liasü.

1989 küm Janata Dal-i sorkar akümba mapang nung pa 1989 küm nungi 1991 küm tashi Aligarh nungi MP inyaka liasü.

1996 küm Lok Sabha election nung pai Samajwadi Party nungi Aligarh menden nung toktep saka tamakok angu. 2004 küm pai Bharatiya Janata Party nung aden.



August 05, 2025 nü New Delhi nung Ato kilonser Narendra Modi, Defence Minister Rajnath Singh, Union Minister J.P. Nadda aser tangartem National Democratic Alliance (NDA) parliamentary party senden nung adenba sülen meyipa aodang tangokba noksa nung angur.



TIR YIMYIM YIMOBILEM (EDITORIAL)

DIMAPUR WEDNESDAY, AUGUST (LUROI) 06, 2025

Government li kümüzka

Assam nung government-i arem wazüka ayudak aser kidanger state-tem den artsülen nisungtemi temelaba melii özüng alema ali atsünga agiba tesemtem nung yim künfteta alibatem dena raksaja meindokba mapaji government ali metetmeteta inyakogo. Atangji, government li atsünga agiba asüyonga, joko pei yim kümer küm aika alir asünungji, parnoki yangluba kiojentem bentoktsütsüba tapayutsüka aser temeimtsüka, ajisüaka government dang taküm lira, özüng raksartemi government li atsünga agiba meyipa agitsüba jibo taochi makaba mapa ka masü saka özüng raksartem anema inyakba mapa tapet ka asütsü. Iba amajika meinyakra, oda-oda küm ishika tsüngda nung tang anünga akaba aremjia maka küma atsüngseper alitsü. Ano, Assam nungbo government-i wazüka ayuba arem lepdoker yim küma alirtemji lisopurtem masü saka Bangladesh nungi arur bendangertem teimba liasü, iba jagi balaka Assam nung lisopurtem shisabolua bilemer, kechiyong küm ishika tsüngda nung Bangladesh nungi arurtem nüboji zünger mezüngma züintsü, anungji election nunga parnoki mulungba aser yaribalen dang takok angutsü, anungji idangjibo lisopurtem ola maka akümstsü. Item ajakji yimdangi arua Assam nung mulungjang nung meinpronga bilemba agi, tang Assam government-i item yimtem ajakji atsüngdoker ali acre meyirijang aika government-i meyipa agiadokogo. Itemji dang masü saka Guwahati amala yimtem nunga government li temelaba melii atsünga agiadoker alibatem ajak meyipa agiogo. Aji oda, küm aika government-a mali amato, government li atsünga yim akümba tashi memetet züzüa lia arur külen, tang government li atsünga agia aliba meyipa agiba dang masü saka Assam nungi Nagaland nütsüng yongsük dang nungi teimba Bangladesh nungi arua senso küma alitsü merangertem meindokba jagi, Assam li dang masü saka Assam saobaliba aser yimten kümüzka ayur asütsü. Ashiko, item rongnungji meyirijang ishikabo Nagaland nung arua jenoka alitsüa akok, kechiyong asenokibo nisung mashishir aser meimba dang masü saka asenokbo mapa inyaktsü atema parnok nüngdaker. Ibayongji, asenokibo parnok nem asenok tenünga agütsür aser yimten nüchiso bushiba mapa nunga shilem agidaktsür. Ajisüaka, tanü tensa Assam nung dang masü saka US nung dena bendangertem temelaba magii arua America nung kidang aser alu nung mapa inyakertem ajak pei limai meyipa yokba mapa aser nükjidongji asenokia angatetsüla aser tarutsü nung asenoki ngua asen lima bendangertem nem mamoksepdaktsütsüsa asenoka Nagaland government-i anir government ali metetmeteta özüng raksar anema inyaktsüla. Aji oda, bendangertem temelaba melii arua alirtem meindoker külen parnoki inyaka aliba mapatemji asenok lisopurtemi jet ta melenzüktsüla. Atangji, asen lima nunga özüng alema arua bendangertem alibaji dang masü saka Asam nung amaji asenok lisopurtemi government li atsünga agia alibatema azüngtetdaktsütsüla aser meyipa agitsüla. Dimapur nungbo tayimtsü anendak aser mozü ki kimalen lisopurtemi government li atsünga agiba tesem karbo meyipa agiogo. Ajisüaka, Dimapur kisüng nunga government meyong arem aser ali atsünga agiba purtem aika lir. Ano, lenmang sademsadema yutsütsü melen lenmang lendi tashi adoka ali atsünga agiba lisopurtema aika lir. Itemji kata mezütoki government-i khen reprangdangtsüla aser Assam government amaji arem nunga sang aser yimti nunga sang, government li atsünga agibajibo kibur meteta government-ia agiadoktsüla. Joko, government libo shinga meyonga masü ama bilemba tangatetba to asenok kolok nungi odaktsütsüla aser government nung alir yimsüsür aser ketdangsertemia government tashi amshia pei asoshi government li atsünga agiba tangatetba tila aser morumoru shisatsü endoktsüla. Aji oda, taoba mapang aser tang government nung yimsüsür aser ketdangsertem kari danga pei ket nung tashi alidang, iba tashiji amshia government li tilaka danga agia lira, government nem meyipa agüjang. Ase n lima yanglushitsüba jibo yang nung jagi tenzüktsü !

OLEMSABANG

Asenok lisopur saksalemstsü aser longjemshitsü tensa kati menepogo

~ L. Kika Pongener

Tanü asen lima nung asenok lisopur tzüma-longmar tsüngken tsübuseta alitsüsa tensa mapang kati menupogo. Iba ya asenoki asen sasa atongtetba asütsü. Taoksatsüka, asen lima nung asenok lisopur tzüma-longmar ka nema züka merenshidaktsütsüsa akümba ya, parnoki atongtetba masü asenoki asen sasa atongtetba asütsü. Tanü asen lima nung tzümartem nutsüng yongsuk anogo shia amai renloka aor. Dimapur nung balaka Train nung anogo shia kwika arua alitsü (?) Ano Assam nung Illegal Bangladeshi Immigrants (IBI) aritokertem, ashiko, kinuk-kisang kolen-kolen nungi karbo Dimapur nung arua alitsü akok. Item tzümartem ya asen lima nung mapa inyakra meinyakmai mazüangi inyaka takar akümer. Tanü putu ya shir ket nung rongsen aka alimaji parnok meyong aser lenla ajak nung kibur akümba putu ka lir. Asen lima nung tzümartem asenok madak asenoki kibur kümdaktsüogo aser asenok lisopur parnok küpok kilir kümogo. Iba jago, tanübo asenok lisopur kecha sukshia mali anungdang anu-pua kecha tarentak meli-i asenok dak teka sangshitsü tashi temulong ulur. Tanü Dimapur nung tzümartemi lapokba Dokan aika nung parnok 'Body Guard' asenok lisopur aika yua lir. Ano tzümartemi lapokba Dokan aika nung asenok lisopur aiur-asangur 'Sales Boy & Sales Girl' aika yua lir. Shitakba-bo asenok lisopuri lapokba Dokan nungang tzümarji 'Sales men' ayutsüba sernung...!!! Iba tiaji kümogo.

Asenoki jungjunga shisadanga, asenok tali mashiba ajanga asen lima nung asenok lisopur madak tzümar kibur kümdaktsür. Asenok Naga nung tashimait kaji, asenok lisopur tsüngda nung, kari kar akoktsü merangba, kari kar madak tashi amshiba aser kibur asütsü merangba....Ibala shisatsü aser jaklaliruji asen Naga nung ajak dak keta lir. Yongji, asen Naga nung telongjem (Common Front) ka malir. Aji oda, kin shia pei pei kin sasep nungbo telongjem alitsü akok. Otsüla oboula nungeri jembia aruba....Mapang ka nung Shitsük o An-tepong na tembar yimteper, kenu Shitsük-i An-tepongji par kidangi chiyungi jaok, aser shi teret sor chiyungdaktsü, saka An-tepong dakji tepo (Teeth) maket asünung, An-tepong-i shi teretji mechitet. Idangji Shitsük-i temba na kechiba shi machir (?) ta asüngdang....Idangji An-tepongi temba kü dak tepo maket aja ta langzü. Iba anogo nungjiang Shitsük jagi An-tepong dak tepo maketbaji meteta aküm, aser pai An-tepongji kangasa tsübuseta aliba metsübui aküm....Yongji, tanü tashi Shitsük-i An-tepongji kecha metsübui ngoseta achitsüsa kümadok. Asen Naga nung asenok o asenok na tsüngda nung meputepi kati ka arishitepba....Ibaji tzümartemi angur aser ibajagi tzümar asenok tsüngken metsübui akümer.

Ano tangar kin oda yutsür asen Aor dak tashimait kaji....Asen Aor yimtsüng shia pei pei yimer sasep nungbo telongjem alitsü akok....Saka Aor rangben nungbo asenok telongjem (Common Front) ka mali. Asen Aor ajak dak ni, ozü, onok, par, parnok ta bendangba jakla-yimya ya kangasa keta lir. Tatishitsü ka....Tangar kin kari asen Aor kar dak tim masüba mapa kar inyaka lia....Aor kar ajanga sua denjira.... Asen Aor-sangji yaritsü, kümüzksü, mesura tepo akümstsü melena.... Paji shiba (?) Koyimer (?) Kechi kidong (?) Shir kinunger (?) Kechi inyaker (?) Kong alir (?)....ta ajakji süksa-a asüngdangteptsü....Aser idangjibo nisungji tasütsüa süatoker aser tamajungerjia jena oadoker alitsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Chhattisgarh state nung tepuokdak pastor pongu dak azük



July 20, 2025 nü Chhattisgarh kübok Durg district nung Khristanem tekülem sentong tagidak mapang Tenla kima Bajrang Dal züngsemtem adenshia aliba noksa nung angur.

August 05, 2025: Chhattisgarh nung pastor temi tangartem Khristan yimsü dangi meyipdaksür, ta tai tonglokja pastor trok apuba sülen jail nung pastor pongu dakbo kanga mejungi azük, ta osang ka ajanga metetdaksü.

Chhattisgarh state nung Durg district kübok Bhilai nung pastor, Moses Logan-i, July 21 nü Durg jail nung jailor aser tanükertemi pastor pongu dak azük, ta metetdaksü.

Osangbener den jembidang pastor Logan-i, "Onoki aibelen kecha meinyak, ajisüaka onok anema aibelenba ken o benok asü?" ta ashi.

Paisa, "Parnoki iba maongka agia ken o kecha mangadangi onok dak azük. Onok Khristan asübayong onok dak azük," ta metetdaksü.

July 20 nü Pastor Abhinav Baksh leniba nung Khristanem tekülem sentong tagidak mapang nung Hindu nunger telok kati timtem agüja liasü. Iba sülen police-i Khristanem Jamul nung aliba police station-i anir ao aser pastor trok anema ken o benoka liasü.

July 20 nü pastor temji apuba sülen kasa aonungjisa Durg jail-i anir ao.

Pastor Logan-i, "Joko Khristanem pei kidang, Tenla kidang mesüra jail nunga kümzüka mali. Onoki tekümzüka atema aser ochi temeden atema bushirtemi (police) onok bendanga züngshir aser onok dak azüker. Onoki iba atema kanga sasaa bilemer, kechiyong onoki melung lemtetba nisungtemi (police) onok dak azüker. Police dak tejenokdak bushitsü ya lendong ka kümogo," ta metetdaksü.

Durg jail nungji jailor aser ketdangsertemi pastor Logan dak alaka ajak süoshi semzükdakja liasü.

"Ni temang majung, ta ni ashiba agi nibo süoshi mesemzükdaksü," ta pai ashi.

Aonung piyong jail nung ayuba sülen tasügnep jailor-i pastor tem dang asüngdangya aser parnok osang tejangja asüngdanga liasü.

Pastor Logan-i, "Asüngdangyabaji inyakyim nung lir, ta bilema onoki kechi ataloktsüar memeteti pastor

temi telangzüba agütsü. Ni jailor dang ni security business inyaker aser mapang alidang pastor mapa inyaker ta ashi. Iba sülen jailor-i tanünga pastor pongu dakji azüksü tuyu," ta metetdaksü.

Pastor tem dang anünglen teka anaprong songlatsü tuyuba sülen parnoki ajok agi pastor tem dak telang aser temokok nung azük, ta pastor Logan-i ashi.

Parnok dak azükbaji ni mereprangteti liasü, ta paisa ashi.

Tesülen yimti nung aliba Khristan lenirtem aser pastor kibongtem arua parnok atema bail meshizüksüba sülen July 21 aonung 7:00 ako nung chiok.

July 20 nü Pastor Baksh-i aniba Arogo nung züngsemtem tekülem sentong agiba mapang nung Hindu nunger 35 shi Tenla kidangi aruba sülen yimyim ayima Khristanem dang o tamajung aika ashi.

Iba mapang nungji Pastor Baksh-i phone ajanga Pastor Logan nem iba osangji metetdaksü aser pastor Logan-i Jamul police station-i oa teyari meshia liasü.

Police aruba mapang nung Bajrang Dal züngsemtemji Tenla kima Hindu nunger ken tena liasü.

Arogo nung züngsemtem kümzüksü atema Pastor Baksh-i Tenla kiji telung nungi shibanger liasü. Police-i Tenla kiji lapokdaksü aser Hindu nungertemji meindoktsü meranga liasü.

Hindu züngsemtem jagi, iba Tenla kidangji Arogoi tangartem mesüzüka Khristan yimsü dangi meyipdaksür, ta tai tonglokja Khristanem aser lenirtem anema ken o benoktsü takhangba agüja liasü.

Iba sülen police-i Arogo nung züngsem ajakji bus ka nung police station-i anir aotsü lemtet saka bus nung masemba agi karbo kidangi meyipa yok.

"Pastor tem den Khristan 40 shi police station-i anir ao," ta Pastor Logan-i ashi.

Iba tesem nungji Amongnü shia Arogo aseme mapang balala nung tekülem sentong agia arur. Mezüngbuba tekülem sentongji anepdang 8:00 ako nungi 10:00 ako tashi agir, iba sülen tanabuba sentongji Pastor Logan leniba

nung 10:00 ako nungi nikongdang 1:00 ako tashi agir, aser tasembuba sentongji Pastor Baksh leniba nung nikongdang 1:30 ako nungi 4:00 ako tashi agir.

Police station nungji Khristan ajak dang asüngdangya; parnok tenüng, talidak aser parnok kechi mapa inyakerar asüngdanga liasü.

Tesüsa police ketdangsertemi Pastor Logan, Pastor Baksh, Pastor K. Thomas Gunta, Pastor Komal Kothari, Pastor Om Prakash Sahu aser Pastor Satya Kumar nunger anema dang ken o benoka liasü. Mezüngbo pastor temji Sub-Divisional Magistrate dangi anir ao, saka parnok senshiadoker aliba agi Durg jail nung puoka liasü.

Item tatalokba sülen July 22 nü Khristan 400 shi Jamul Police station nung adenshir longkak aita liasü.

July 24 nü Khristanemi police ketdangsertem nem temepishiba shidi ka agüja aibelenertem anema inyaktsü takhangba agütsü.

Ajisüaka tang tashi Hindu nunger aibelenertemji mesüra jail ketdangsertem anema ken o mebenok.

Goa nung anti-conversion ozüng nüngdak: Pramod Sawant

August 05, 2025: Goa nung Chief Minister-i state nung ozüng alema tamangba yimsü meyipdaksüba nokdangtsü atema anti conversion ozüng ka benoktsü nüngdak, ta metetdaksüogo, ta International Christian Concern (ICC)-i metetdaksü.

State assembly nung jembidang Chief Minister, Pramod Sawant-i, joko state nung anti conversion ozüng ka benoktsü mapang tongogo; tamangba yimsü meyipdaksüba nokdangtsü atema Uttar Pradesh ama state temi inyakba ama inyaktsüla, ta ashi.

Tzüngluruwa mongpu state legislative assembly senden nung jembidang Sawant-i anti conversion ozüng benoktsü atema metetdaksüba sülen yimtenren lenirtemi iba onük nung o entep tenzükogo.

Talisa opposition

Tebelem

Nenok tebelemer aser khu reta abener ajak Kü dangi arung, aser Ni nenok nem anisüngzük agütsüdi. Nenoki kü süngra nung apuang aser nenoki nenok tanela asoshi anisüngzük angutsü. Mathi 11:28-29.

Nai Khrista yimsü nungji belemadokra, ne tashi atsüsepra, na tesendaktep nung pelaa alir masü, nai yimsü amshir. Yisui Pa den tesendaktepi ne tanela nem anisüngzük bener arutsütsü ta ashi. Nai Kibuba den jajaba nung na belema makümtsü, iba yagi ne nem tashi agütsütsü aser ne taküm küm küma kümdaktsütsü.

Mapa meranga inyakba mesüra junga memejangba agi na belema kümdaktsür. Iba tani tebelemji anisüngzük junga agiba ajanga tashi tasen angutsü akok. Saka idakji shi temang atena oa belemba tebilemba ka lir. Idaki nunga atua bilemba (emotion) tebelem ka lir. Tangar nüngdak asoshi khuret abenba nung belemba tebelem ka lir. Anisüngzüktsü asoshi nai sodi agitsü akok saka sodi jagi tanela belemba nung anisüngzük agütsütsü makok. Khrista nung anisüngzükba ajanga dang ibai shidak kümdaktsütsü akok.

Tejangra Khristan kari Khrista tenzüksü asoshi parnoki inyaktsü akokba ajak inyaktsü meranger aser teinyakdak nung parnok sasa aniadoker. Parnok nem Yisui Pa dangi orr angazüktsü tajaba agütsü. Yisu alima nung alidang pa mapang nüngdaka alir telok den indok. Pai Pa anemertem ajurur, Pai aonung tepiyonga sarasadem aser Pai Pa kija ken ken dang ali. Aji saka Pai teti Tebu nungi aruba anisüngzük aser tashi agi. Iba tetezü Yisui mapa meinyak ta masü saka Pai tanelaren anisüngzük angulenji metetta liasü. Na belema lir asü ? Yisu dangi oang aser Pai ne nem Pa anisüngzük agütsüdakjang. Pa anisüngzükji Kechaia magütsütetba anisüngzük ne tanela nem agütsütsü.

Catholic Khristanem lir. Goa nung anti-conversion ozüng benoka agizükra ibaji yimtenren nükjidong ataloktsü atema amshitsüa akok ta bilemer.

Goa nung osangkaket ka nungbo yimobilem nung yamai zülü, "Asen state ya Hindu nungertem, Khristanem aser Muslim nunger tsüngda raraba tesem ka masü, anungji iba ama ozüng ka benokba ajanga yimsü kar anema inyaktsü aser nüburtem tesünep nung aliba raksatsütsü."

Anti-conversion ozüng ya tang India kübok state 12 nung benoka lir; item states ji Arunachal Pradesh, Chhattisgarh, Gujarat, Haryana, Himachal Pradesh, Jharkhand, Karnataka, Madhya Pradesh, Odisha, Rajasthan, Uttarakhand aser Uttar Pradesh lir.

AO OSHI ANGAZÜKDAK:**TANÜ ANGAZÜKTSÜBA OJANG****Tesayur**

(n) len tuyur, tangatetba agütsür nisung (teacher)

* Tesayur nem ajaki akhümtsübu agütsür.

Tesayuyim

(n) sayuba yimya, angazükdaktsüsbayim (pedagogy)

* Tanü asüng tesayuyim nung kaketshirtem nem shilem agidaktsür

**OLONG PAITEP # 7231**

1						2				3
								4		
5		6				7				
8										9
								10		
				11		12				
		13								
14						15				
				16						

TIPIEN

- O jembitsü tashi - 8
- Süngjang tapu ka - 5
- Tekanük nung enokba - 5
- Teka amtep - 5
- Tzüik asendak - 5
- Tsüngpang tema aliba - 5
- Ken atenba yimya - 5
- Asangur - 8

LANGTSÜNGLEN


- Tepok telung nung shilem ka - 7
- Tamajung aküm - 5
- Chi den külemi achiba - 3
- Meimchir alimai aruba - 3
- Laishiba nung ayong ka - 4
- Tarutsü nükla - 7
- Tamendakdak/Nükjidong - 4
- Tenük-telen mejungi aküm - 5
- Terok nungi adokba - 3
- Meimchir telemsa - 3

OLONG PAITEP # 7230 TELANGZÜBA**TIPIEN :**

- Taa, 3. Teküm, 6. Aibelen, 7. Aut,
- Ajizük, 10. Ojala, 11. Semer,
- Sen, 15. Kioktsü, 17. Itsük,
- Kar.

LANGTSÜNGLEN :

- Tai, 2. Asensor, 3. Tanü, 4. Kua,
- Mitsüktsü, 6. Azübenshi, 8. Lah,
- Jangkok, 12. Akok, 14. Nashi,
- Sür.

NAI-A YA METETTER MA

Germany nunger inventor Johannes Gutenberg-i 1440 aser 1450 tsüngta mezügbuba printing press yanglua liasü. China aser Korea nung inventor temia merang agi ajunghitetsüsa yanglur liasü saka pai mezügbuba mechanized process ka yanglua liasü.

Tanur asoba anogo nung salem osang den noksa angati adokdaktsünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tirymyim@gmail.com nung yokang mesüra Tir Yimyim bureau tem nung agüjang.

Manipur nung ano ita trok President's Rule benoktsü agizükogo

Manipur nung ano ita trok atema President's Rule atsülangtsü asoshi Mongolbarnü Rajya Sabha nung agizükogo

Imphal, Luroi/August 5

(Agencies): Manipur nung ano ita trok atema President's Rule atsülangtsü asoshi Mongolbarnü Rajya Sabha nung agizükogo.

Union Minister of State for Home Affairs, Nityanand Rai-i Upper House nung iba bangzüng ya benok, aser kasa mapang nung opposition temi iba anema longkak aita liasü.

Bangzüng ya Lok Sabha nung July 30 nung agizükba sülen Mongolbarnü Rajya Sabha nunga agizükogo.

Centre sorkari Manipur nung President's Rule ya February 13 nü benoka liasü. State nung azütokshi lendong tulu ataloker aser yimden yimsüsüba nung mepetmesü adoker aliba mapang Chief Minister N. Biren Singh-i pa mapa toktsüba sülen

President's Rule ya benoka liasü.

Linük temzüng ozüing nung ocet 356 benoka Centre-i Manipur yimsüsüba azüoka liasü. Tir-i Angh ajanga state yimsü asütsü.

Home Ministry sangdong ka ajanga ashiba agi, Parliament-i Manipur Legislative Assembly indang tashi amshitsü.

Temzüng ozüing ajanga state inyakyim achaayangtsü asoshi Angh indang shilem agütsü atema tir nem tashi agütsüogo, aser Centre nungi indang indanga yimsü asütsü asoshi legislative provisions kar khen atema thija atatsü.

Temzüng ozüing dak ajemdaker state sorkari pei state yimsü mesütetba mapang Centre-i President's Rule ya benoker. Manipur nung mapang

talangka mepetmesü adoker aliba mazüoktetba ajanga iba jenjang agütsüa kümogo. Legislative tashi agütsü aliba mapang Centre sorkar mesüra Parliament-i state indang legislative telemtetba balala agütsü.

President's Rule ya mapang ka nung ita trok atema dang benoktettsü. Iba mapang Union sorkari state inyakyim achaayangtsü aser tensa dang junga kümra assembly election agishitsü atema ayongzüksü.

Manipur nung mepetmesü ya Meitei aser Kuki-Zomi nunger tsüngda mangatettep adokba ajanga tenzüka liasü. Iba mepetmesü nung nisung noklang aika taküm samaogo aser nisung 60,000 shi pei talidak toktsür aotsüsa kümogo.

Mizoram sorkari state yimtiba melenshitsuäken o jangjashitsü**Aizawl, Luroi/August 5**

(Agencies): State yimtiba Aizawl nungi Serchhip district kübok Thenzawl-i belener aotsü sentong lir ta osang adokba ya tai ta Mizoram sorkari Hombarnü jangjashitsüogo.

Official sangdong ka ajanga state sorkari ashiba agi, Union Ministry of Housing and Urban Affairs-i agütsüba shiti nung aibelen ka aliba ajanga mangmangteper.

Shiti ya April 24 nü Mizoram Chief Secretary aser Delhi nung state indang Resident Commissioner dangi yoka liasü. Shiti nung state yimtiba ya

Aizawl nungi Thenzawl-i belener aotsü shisema lir aser iba atema Detailed Project Report (DPR) ka yanglutsü asüngdanga liasü.

Urban Development and Poverty Alleviation Department-i ashiba agi, shiti ya state yimtiba melentsüba atema masü saka "Thenzawl Peace City" project atema liasü. Ministry-i iba mapa atema DPR yanglutsü asoshi sen crore 10 lemsatetsüogo.

Thenzawl ya Aizawl nungi km 93 pilar aliba census jila ka lir aser Serchhip constituency küboki aiter, koba Chief Minister Lalduhoma

indang constituency lir.

Opposition Mizo National Front (MNF)-i, nüburtem nungi temelaba magi-i state yimtiba belener aotsü merangba atema Chief Minister aitsüba sülen iba ken o ya jangjashitsü liasü.

Taoba mapang Chief Minister-i, Thenzawl aser iba temeket nung aliba tesemtem ya 'Peace City' kümdaktsütsü sentong aliba, aser iba atema centre-i teyari agütsütsü imlaba lemsatetp liasü. State sorkari ashiba agi, iba sentong ya urban development atema lir aser state yimtiba dak kecha sendaka mali.

Shillong-Silchar lenmang atema Meghalaya sorkari ali mekazük tenzüko**Guwahati, Luroi/August 5**

(Agencies): Sen crore 22,864 intoka Shillong anasa Umiam Lake aser Assam nung Silchar sendakteptsü asoshi greenfield high-speed corridor ka yanglutsü aliba atema Meghalaya sorkari ali mekazük tenzüko, ta ketdangsürtemi Mongolbarnü metetdaktsü.

Km 166.80 talang four-lane expressway ya National Highways and Infrastructure Development Corporation Limited (NHIDCL)-i yanglutsü aser iba ya Ri-Bhoi district

ajanga aotsü. Lenmang ya Meghalaya nung km 144.80 aser Assam nung km 22 asütsü, ta ketdangsürtemisa metetdaktsü.

Ri-Bhoi Deputy Commissioner Abhilash Baranwal-i lenmang yanglutsü asadanger aliba tesemtem nung alirtem dang pa indang office nungi temelaba magi-i kiojen kecha meyanglutsü tetuyuba agütsüogo.

"Mekazüka aliba tesemtem nung osang agütsüba sülen temelaba magütsü yangluba

kiojentem atema ali alizükba mapang mesüra mapa benoka inyakba mapang temenok kecha magütsütsü," ta DC-i metetdaktsü.

Ali alizüktsü atema yimtsüng 17 shimer lir. Yimtsüngtem rongnung Pyllun, Umeit, Umroi Labansaro, Nongrah, Nonglakhia, Wahmyntait, aser Lumsophphoh nunger densema lir.

Iba high-speed corridor ya Shillong anasa Mawlyngkhung nung tenzüksü aser Silchar anasa Panchgram nung tembangtsü.

Pei sasa intermediate-range missiles soita aliba menüngdaker: Russia



Sergey Lavrov

Moscow, Luroi/August 05 (Agencies): Nuclear amshitetba intermediate range missiles mamshitsü pei sasa nokdanga aliba yagi joko alena mali ama züngshir, ta Russia-i sangdongogo, anungji Ukraine mechi Moscow aser Washington tsüngta tensa mejungi akumba mapang nok-nü tasen toktepa yanglutsü asoshi sapang lapoktsür.

Russian Foreign Ministry ajanga Hombarnü sangdong ka nung iba telemtetba ya US aser par tembar temi intermediate range nok-nü yanglutsü merangba aser Europe aser danga alima tesem balala nung yoktsü renemshiba den sendakteptsü. Taruba küm nungi tenzüka Germany nung Typhoon aser Dark Eagle missiles yoktsü US senton aliba alakteta athishia liasü.

US aser par allies temi iba ama mapa inyakba ajanga Russia anasa "destabilizing missile potentials" adokdaksür aser asen linük asoshi security nung tetsükdaksü indang-indanga agütsür aser nuclear tashi alirtem tsüngta tensa tamajungba akumba densema regional aser global stability asoshi timtem bena lir, ta ministry ajanga ashi.

Kremlin-i kechi mera agitsüar ajibo tejangia shia mali, saka Tir Vladimir Putin-i taoba mapang sangdong ka nung, kidanger aser tembar Belarus linük nung küm tatemlen Oreshnik missiles tasen yoktsü Moscow sentong lir, ta shia liasü.

Russia-i intermediate-range nok-nü ya kodang yoktsü ta asüngdang dang, ibai jelia sangdongla masü, ta Kremlin odongtar Dmitry Peskov-i ashi.

"Russia talenba mali, Russia kecha agia alena mali ama züngshir. Anungji nüngdakra tapet mera agitsü shidak ta Russia-i amanger," ta Peskov-i osangbener dang ashi.

"Telangzüba agütsütsü aoshi telemtetba agiba indang Russian Federation leniri America aser danga Western land-based intermediate-range missiles yokba aser international security aser strategic stability ajunga nung tensa asadanga nung ajemdaker sangdongtsü," ta Foreign Ministry ajanga ashi.

2008-12 tsüngta Russia tir

inyaksang Dmitry Medvedev-i rara mesüa sangdong agütsüba ung ajemdaker US nuclear submarines ana tesem melenshia renemshitsü totuyuba agütsür, ta US Tir Donald Trump-i Hokulbarnü sangdongba sülen Russia nungi iba sangdong ya agütsür. Ukraine den yimjung tezüngzüktep ka yanglutsü asoshi Kremlin nem anogo lazüktsüba tang hopta tatemlen tembangtsü lia Trump-i iba sangdong ya agüja liasü.

Medvedev yimya agi pa aoksar ta Trump-i ashi. Putin mendenpuba sür aliba Russia indang Security Council nung Medvedev ya deputy chairman lir, aser pai mapang shia nuclear amshitsü amokmerenasa sangdong agüja arur.

Trump-i Russia dang Ukraine nung yimjung alitsü tezüngzüktep ka yangluang, aji mesüra sanctions agütsütsü ta anogo züngzüksüba langzüa, Russia den tatembang asaya masayatsü Medvedev-i langzüa liasü aser anogo züngzüka yutsü shia rara tsütsüi mera ka-ka aor, ta ashi.

Foreign Ministry indang sangdong nunga Medvedev-i bhukuma, NATO linüktemi anti-Russia policy yangluba mechi Moscow-i pai sasa nokdanga aliba salar, ta ashi.

"Asen anemer ajunga asoshi ibai asangsang tasenbaji lir. Ano mera tali agitsü imlaang," ta pai X nung zülü.

Intermediate-range missiles yagi meta kilometres 500 nungi 5,500 tashi aotsü akoker. Iba amala land-based weapons ya 1987 Intermediate-range Nuclear Forces (INF) Treaty kübok nokdanga lir. Washington aser Moscow nati 2019 küm iba tezüngzüktep

nungi pila aser kati ka dak tai tongloksü, saka US-i mera magira onoki ozü sasa azüoka alitsü ta Moscow-i sangdong.

INF Treaty loksaba ajanga Cold War mapang European missile crisis adokba kasa ajurutsü tetsübo aita daksü, kodang US aser Soviet Union, linük anaprongi 1980s mapang continent nung intermediate-range missiles yoka liasü.

Iba amala nok-nü ya tetsübotsü taketba ta züngshir, kechiaser intercontinental ballistic missiles den medemdangra intermediate-range missiles yagi targets atongtsü mapang kanga agi tajemba agir, anungji telemtetba agirtem nem mapang magütsür aser 'false launch warning' mechi alima nung nuclear rara tenzüksü anasabai anir.

Russia indang missile forces tekolakba-i Russia-i Ukraine anema November ita mezüng amshiba Oreshnik intermediate range missile tasenba yagi Europe nung tesem ajunga atongtsü ta sangdong. Oreshnik nungya conventional mesüra nuclear warheads abentsü akoker.

Putin-ia Oreshnik tushia jembi aser warheads aika bener Mach 10 tashi kera oa target nung kongshitetba ya khazüka yoktsü mesüra soittsü khenyongi tamakoktsü aser itemi ishika mapang ka nung khaloktsüba ya nuclear agi amakba den sako raksatsütsü ta ashi.

Kyiv nem shiri pei indang longer-range missiles amshia Russia linük telung nung makdaksüdir, item linük dak Moscow-i iba missile amshia amaktsü, ta Putin-i tekumdangtsü shia lir.

SÜR KÜM KA AJUNGER

Late Limainla Jamir
29/06/1976 - 6/8/2024



Temiem oja,

Anujunger akümü ajurutsü makokba limai na or tanü agi küm ka ajunger. Na onok den meliaka taküm tensa ajak nung tepela aser nüktzü mapang nung onük mulungjang nung na lidaktsür. Nü ternemtet shisatsü mapa tajung angudang onok molung anisüngzüker. Shia aruba Kibuba anogo nung asenok pela ajurutsü yimlar.

~ Nu temeim jabaso aser kinungertem

GOVERNMENT OF NAGALAND DIRECTORATE OF HIGHER EDUCATION

NAGALAND: KOHIMA.

Website: www.highereducation.nagaland.gov.in

Email: dir.highedu@gmail.com

NO.HED/SCHO/MISC/36/2025/504Dated, Kohima the 5th August, 2025

IMPORTANT NOTIFICATION REGARDING FAMILY INCOME CERTIFICATE FOR CSS- POST MATRIC SCHOLARSHIP FOR ST STUDENTS.

The Scheme Implementing Agency hereby informs the general public and the student community that the competent authorities to issue "Family Income Certificate" designated by the state government vide notification NO.HTE/HE/SCHO/20-10/022/893, dated the 30th July,2025 in supersession of the earlier government notification vide No. HTE/MISC/SCHO/1-150/2019 dated the 25th November, 2024 is available at the Directorate's website : www.highereducation.nagaland.gov.in

Sd/-
(V. LOVITOLY SEMA), NCS
Ex-officio Director
Higher Education,
Nagaland: Kohima.

Netanyahu-i Gaza amokbangtsü telemtetba agiogo



Benjamin Netanyahu

Jerusalem, Luroi/August 05 (Agencies): Gaza Strip ajunga amokbangtsü sentongtem Israel Ato Kilonser Benjamin Netanyahu-i sangdongtsü renema lir, ta Israel nunger osangtem ajanga ashir.

Netanyahu-i iba telemtetba agiba ajanga Hamas-i pua bener aortem yua aliba tesemtem densema Israel mitkar temi iba li ajunga nung operations agia aliba ulushitsü, ta i24NEWS, The Jerusalem Post, Channel 12 aser Ynet nung Hombarnü ashi.

"Telemtetba agiogo ta

Netanyahu indang office nungi ketdangsür kati ashi," ta Channel 12 nung chief political analyst Amit Sega-i ashi.

"Asenoki surrender masü tashi Hamas-i hostages tem joko mechiooktsü, aser asenoki surrender masütsü. Asenoki tang meinyakra, pua alirtem yaseta asütsü aser Gaza ya Hamas kübok alitsü."

Palestinian Ministry of Foreign Affairs ajanga iba sentong aitsüogo aser international community dang parnoki mesüshirba süang, alimai telangzüba agütsüba asadangtsü asoshia süang, mesüra shidakba inyaktüba süang, parnoki inyakba nokdangtsü asoshi tangsa tetetsüng ajemoktsüla, ta ashi.

Gaza nung küm ana tajunger rara aruba Israel mitkari ano kechi mera agitsü ta jembitsü asoshi Netanyahu-i par war cabinet Mongulbarnü jatepa lia iba osang ya arur.

Chiyongtsü shidak achi-ajem masüba aser Israel-i

amakba ajanga Palestine nunger tali asüba mechi rara anentsü aser Gaza telungi humanitarian aid tali yoktsü melang ta linük balalai Netanyahu dang ajungshir.

Hombarnü Israel-i amakba nung teyari bushir nisung 36 densema Palestine nunger 74 tepset, ta Gaza nung aliba medical osangtem ajanga ashir.

Linük telungzüker nungia Israel lenir dang Gaza nung Hamas-i pua alir tanüngba nisungtem chioktsü asoshi inyakang ta ajungshiba tali akumer. Hamas-i pua aliba Rom Braslavski aser Evyatar David na indang video ayaba nung tena kanga kongrar aser tashi mait anguba sülen nüburtemi ola adokba tesashiba akumer.

Hamas samatsütsü aser parnoki pua alirtem chiokdaksütsü densema iba rara nükjidong Netanyahu-i akangshia Hombarnü sangdonga liasü.

"Asen rara nükjidong

tongtettsüla: tsükchir madak takok angutsü, hostages tem chioktsü aser Gaza ya Israel asoshi tebilemtsü khuret masü ta kuli sayutsü - Aser iba atema asenok maneni külemi nokdaksüla, külemi raratsüla," ta Netanyahu-i Hombarnü cabinet meeting tenzükdang ashi.

United States aser danga anüolen linük temi Israel-i tashiyim amshiba mangu amai yutsür aser pua alirtem takum samara Netanyahu indang sorkar khuret asütsü, shirnok temulung kanga meranger aser ceasefire agreement ka yanglutsü memulunger aser asen nüburtem samatsütsü yasa-tzüradaktsütsü asoshi ang temulung agütsür, ta Hamas ketdangsür Osama Hamdan-i Hombarnü ashi.

October 2023 nung iba rara tenzüker Gaza nung tanur 18,430 densema Palestine nunger nisung 60,930 dak tema tepsetogo, ta Gaza health ketdangsür temi ashir.

Dr T Ao Trophy: Kohima, Chümu, Mkg & Mon nungeri pei tata asaya akok



Kohima, Luroi/August 5 (TYO): Dr. T. Ao Trophy 2025 inter-district football tournament nung Mongolbarnü Kohima, Chümoukedima, Mokokchung aser Mon nungeri pei tata asaya kokogo.

Mongolbarnü mezüngbuba asaya nung Kohima-i goal 5-1 agi Meluri koka liasü.

Asaya nung Kohima atema mezüngbuba goal Kevizakie-i minute 6buba nung idaktsü aser iba sülen Nisede-i minute 15buba nung tanabuba goal idakja liasü. Maneni Kevisanyü-i minute 19buba aser asaya mezüngbuba shilem nung mapang apuloktsür asayaba mapang goal ka idakja goal 4-0 aküm.

Asaya tanabuba shilem nung

Meluri atema goal ka ya Asie-i minute 47buba nung idaktsü aser Kohima atema goal pongububa ya Thejasetuo-i minute 50buba nung idakja liasü.

Tanabuba asaya nung Chümoukedima team-i asaya amokbanger asaya aser Noklak goal 4-0 agi koka liasü.

Asaya nung Chümoukedima atema mezüngbuba goal Kekru-i minute 25buba nung idaktsü. Iba sülen Paotinsat, Vikholie aser Kekru nungeria goal kaka idakja parnoki asaya ayong aonga koka liasü.

Mongolbarnü tasembuba asaya nung Mokokchung team-i goal 6-0 agi Kiphire kokogo. Asaya nung mezüngbuba goal ya Nyeiwang-i minute 12buba nung own goal ka idakja liasü.

Iba sülen Tongpangnokdang-i minute 18buba nung goal ka idakja goal 2-0 aküm.

Asaya tanabuba shilem nung Sentsang-i minute 36, 41 aser 48buba nung goal asem idakja hat-trick ka agütsü aser substitute Moajang-i minute 67buba nung goal trokbuba ya idakja liasü.

Tatembangbuba asaya Mon aser Niuland na kanga toktepba asayaba sülen Mon-i goal 2-lagi kokogo.

Asaya nung mezüngbuba goal ya Mon nungi asayar Tingshak-i minute 38buba nung idaktsü aser iba sülen Laiwang Bohham-i minute 54buba nung tanabuba goal idakja liasü. Iba sülen minute ana dang lir Hivika-i Niuland atema goal ka idaktsü saka parnoki tanabuba goal midaktsüteti asaya tembanga liasü.

August 6 nü asaya:

MATCH 14:

Tseminyu vs Peren@9AM

MATCH 15:

Shamator vs Zunheboto@11AM

MATCH 16:

Wokha vs Phek@1PM

MATCH 17:

Dimapur vs Longleng@3PM.

AIFF-i ISL Club ti CEO tem den ajuruteptsü

Luroi/August 5, 2025 (Agencies): AIFF ketdangsürtemi linük nung club ti indang CEO tem den ajuruteptsü. Indian Super League (ISL) thitsür aliba mapang tang iba senden ya amentsü lir.

Linük nung league tematiba ya tayonger Football Sports Development Limited-i Master Rights Agreement (MRA) dak sendakba nung national federation den ken o mebenteti aliba ajanga khen atema thija ataba sülen tarutsü atema tebilemtsü ka-a ISL club ti-i All India Football Federation dangi shiti zülua liasü.

AIFF aser FSDL na tsüingda küm 15 atema MRA yanglur aliba ya taküm December 18 nü tembangtsü.

"AIFF ketdangsürtemi

Indian Super League club ti CEO tem den Brehostibar, August 7, 2025 nü New Delhi nung ajurutepta #IndianFootball dak sendakba ken o sensak asemtsü," ta AIFF-i tweet asü.

Taoba mapang ISL club ti-i AIFF dang AIFF mesüra FSDL den ken o kanga junga sensak mesemi sentong yanglutsü tasak kümogo ta ashi.

Shiti nung sign sür aliba club ti rongnung Bengaluru FC, Jamshedpur FC, FC Goa, Hyderabad FC, Kerala Blasters, NorthEast United FC, Odisha FC, aser Punjab FC densema lir.

Kolkata nung amendaker aliba club, Mohun Bagan Super Giant, East Bengal, aser Mohammedan Sporting den Mumbai City FC aser Chennaiyin FC nunger shiti zülur

rongnung densema mali.

Taoba ita AIFF tir Kalyan Chaubey-i, taküm ISL asayatsü ta shiogo, saka koba mapang tenzüksü iba indang osang tejangja magütsü.

July 11 nü ISL ayonger FSDL-i, 2025-26 season ya khen atema thija ataba metetdaksüogo, kechiyong AIFF den 2010 küm sign asüba MRA yanglushitsüba dak sendakba nung ken o mejangjai lir, ta ashi.

ISL ya yimya agi September nungi April tashi asayar.

Supreme Court-i AIFF dang AIFF draft constitution dak sendakba nung tatembangbuba obendang magütsü tashi FSDL den MRA dak sendakba nung ken o sensak masemtsü tetuyuba agütsüogo.



"Run for awareness run against HIV/STIs" omen dak rangloker" Nagaland State Aids Control Society District Red Run 2025 ta sür Mokokchung nunga District Integrated Strategy for HIV/AIDS-i ayongzüka asemtepba sentong ka akaba mapang takok angur den külemi tangokba noksa nung angur. Iba asemtepba nung teburtem rongnung; mezüngbuba - Takasanen Lkr (Senayangba GHSS), tanabuba - Temjensanen Pongen (FAC), Mukom (FAC), aser tetsürtem; Mezüngbuba - Sungtiyala Imchen (Dilong), Tanabuba - Jemie P (Dimapur Govt. College), Tasembuba - Imnatola Longchar (Kichutip ward) liasü. Asemtepbaji Mokokchung CMO office nungi Tongpang Hospital tashi or meyipa arua CMO office nung tembang. Iba asemtepbaji Mokokchung Dy. CMO, Dr. Takusunepi flap off sütsü. Mokokchung, 5th August 2025.

Australia den asayamung atema India Hockey team sangdongogo

Luroi/August 5, 2025 (Agencies): Hockey India-i, Australia nung oa asaya pezü asayatsü aliba asayamung atema asaya 24 tenüing sangdongogo, kong lanur defender Poovanna CB densema lir. Iba team ya drag ficker Harmanpreet Singh lenisüba nung August 15 nü nungi tenzüka Perth nung asayatsü.

Rajgir nung August 29 nü nungi tenzüka Asia Cup asayatsü lia iba asayamung ya India team asoshi renemshiba asayamung ka asütsü. Asia Cup ya World Cup Qualifier ka lir.

"Bihar nung Asia Cup masaya tsüingda onok arangtetsütsü atema Perth Australia-i aoer. Training tajung agiba aser warm up asayatem ajanga onok physical conditioning aser technical execution renlodaktsütsü atema onok rangloker lir," ta chief coach Craig Fulton-i ashi.

Fulton-isa, team nung lanur asayatem anioka tendangba aser asayamung tongtibang ka nung shilem magi tsüingda parnok tangaleni anir oa asayadakja tajangshiba agütsütsüba indang jembia liasü.

"Onoki tajangshiba agütsütsü aser pressure nung asayaba mapang team combination tendangtsü atema lanur asayar kar aniokogo. Kidang masaya tsüingda onok renemshiba mapang iba camp ya kanga tongtibang lir," ta paisa ashi.

Team nung Krishan Pathak

aser Suraj Karkera na goalkeeper asütsü aser Sumit, Jarmanpreet Singh, Sanjay, Amit Rohidas, Nilam Sanjeep Xess, Jugraj Singh aser Poovanna nungeri defend asütsü.

Midfield nung lanur asayar Rajinder Singh-a züngoksemogo aser pa Raj Kumar Pal, Hardik Singh, Manpreet Singh, Vivek Sagar Prasad, Rabichandra Singh Moirangthem, Vishnu Kant Singh nunger den asayatsü. Forward nung Mandeep Singh, Shilanand Lakra, Abhishek, Sukhjeet Singh, Dilpreet Singh, Selvam Karthi aser Aditya Lalage nunger densema lir.

India team ya Hokolbarnü Bengaluru nungi Australia-i aotsü. Parnok tang Bengaluru nung Sports Authority of India (SAI) campus nung training agidar.

Squad

Goalkeepers: Krishan B Pathak, Suraj Karkera.

Defenders: Sumit, Jarmanpreet Singh, Harmanpreet Singh (C), Sanjay, Amit Rohidas, Nilam Sanjeep Xess, Jugraj Singh, Poovanna C.

Midelders: Rajinder Singh, Raj Kumar Pal Hardik Singh, Manpreet Singh, Vivek Sagar Prasad, Rabichandra Singh Moirangthem, Vishnu Kant Sing.

Forwards: Mandeep Singh, Shilanand Lakra Abhishek, Sukhjeet Singh, Dilpreet Singh, Selvam Karthi Aditya Lalage.

Canada Open: Mboko semifinals tongogo

Luroi/August 5, 2025 (Agencies): Lanur asayar Victoria Mboko-i tang asaya aliba Canadian Open tetsür kija asaya nung maneni kanga junga asayadar aser lai quarter nung Spain tsür Jessica Bouzas Maneiro koka semifinal tongtetogo.

Arishi küm 18 tain Canada tsürila, shibai round pezübuba nung Grand Slam ana tashi koker alila Coco Gauff koka liasü, lai iba asaya ya 6-4 6-2 agi koka liasü.

Semifinal nung la 2022 Wimbledon champion Elena Rybakina den asayatsü, koba la asoshi WTA 1000-level semifinal mezüngbuba asütsü.

"Ni idaki semifinal tongtetba atema kanga pelar," ta Mboko-i ashi, shiba tang world rankings nung 85buba nung lir.

"Ni tang mezüngbuba Montreal nung asayar aser tajangshiba ya tamamangtsüka lir aser iba atema kanga pelar," ta laisa shisem.

Mboko küm tenzüka mapang world rankings nung jenjang 333 nung liasü aser taruba hopta rankings update

asüba mapang la top 50-i aitsü.

Season tetenzüki asaya 22 nung khen danga tamakok mongui asayaba mapang lai lower-tier ITF Tour nung asayamung pongu akok aser March ita mezüngbuba WTA Tour nung shilem agia liasü.

La mezüngbuba Grand Slam nung shilem agiba mapang lai French Open nung tasembuba round tonga asaya aser Wimbledon nunga mezüngbuba round nung 25 seed Magdalena Frech tsükdakja liasü.

Bianca Andreescu-i 2019 küm iba asayamung akokba sülen Mboko ya iba asayamung semifinal tonga asayaba mezüngbuba Canada tsür lir. Maneni la ya Belinda Bencic sülen iba asayamung semifinal tonga asayatem rongnung tanutsütila kümogo.

Rybakina, shibai taoba ita Washington Open tanabuba round nung Mboko tsükdakja liasü, lai quarter nung Ukraine tsür Marta Kostyuk 6-1 2-1 agi koka semifinal-i iogo. Kostyuk ya yiruba ajanga asaya tembanga masayatet.

BILEMDANGANG

"Nükmerem indang tsükchirji tetushi aser akhümtsübu."